

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1- 11- 9153-2/26
Tuzla, 07.04.2026. godine

Na osnovu člana 5. i 29. Zakona o Vladi Tuzlanskog kantona ("Službene novine Tuzlanskog kantona", br. 17/00, 1/05, 11/06, 13/11 i 15/17), Vlada Tuzlanskog kantona na sjednici održanoj dana 07.04.2026. godine, donosi

ODLUKU
o utvrđivanju prijedloga Odluke

I

Utvrđuje se prijedlog Odluke o davanju saglasnosti za prihvatanje granta Evropske banke za obnovu i razvoj (Evropski zajednički fond za zapadni Balkan) za projekat GRCF2 W2 E2 – Zgrade javne namjene Tuzlanskog kantona.

II


Prijedlog Odluke o davanju saglasnosti za prihvatanje granta Evropske banke za obnovu i razvoj (Evropski zajednički fond za zapadni Balkan) za projekat GRCF2 W2 E2 – Zgrade javne namjene Tuzlanskog kantona, dostavi će se Skupštini Tuzlanskog kantona na razmatranje i donošenje.

III

Odluka stupa na snagu danom donošenja.

DOSTAVITI:

- 1 x Skupštini Tuzlanskog kantona
- 1 x Ministarstvu finansija
- 1 x Evidenciji
- 1 x a/a



PREMIJER KANTONA
Irfan Halilagić

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", broj: 7/97 i 3/99 i "Službene novine Tuzlanskog kantona", broj: 13/99, 10/00, 14/02 i 6/04 i 10/04), člana 23. stav (1) tačka b) Zakona o dugu, zaduživanju i garancijama u Federaciji Bosne i Hercegovine („Službene novine FBiH“, br. 45/25) a u vezi sa članom 57. Zakona o izvršenju Budžeta Tuzlanskog kantona za 2026.godinu („Službene novine Tuzlanskog kantona“, br.18/25 i 3/26) i tačkom II-10. Procedura zaduživanja Tuzlanskog kantona na osnovu unutrašnjeg i vanjskog duga („Službene novine Tuzlanskog kantona“, br.17/25), na prijedlog Vlade Tuzlanskog kantona, Skupština Tuzlanskog kantona, na sjednici održanoj dana _____ 2026. godine, d o n o s i:

ODLUKU

O DAVANJU SAGLASNOSTI ZA PRIHVATANJE GRANTA EVROPSKE BANKE ZA OBNOVU I RAZVOJ (EVROPSKI ZAJEDNIČKI FOND ZA ZAPADNI BALKAN) ZA PROJEKAT GRCF2 W2 E2 - ZGRADE JAVNE NAMJENE TUZLANSKOG KANTONA

I.

Tuzlanski kanton (u daljem tekstu:Kanton) prihvata grant namijenjen za finansiranje Projekta GRCF2 W2 E2 - Zgrade javne namjene Tuzlanskog kantona (u daljem tekstu: Projekat), po Ugovoru o grantu zaključenog između Bosne i Hercegovine (u daljem tekstu: Primalac) i Evropske banke za obnovu i razvoj (u daljem tekstu: EBRD), koji se odnosi na Evropski zajednički fond za zapadni Balkan, u iznosu do 2.000.000,00 EUR.

II.

Sredstva granta iz tačke I. ove odluke koristit će se za implementaciju mjera energetske efikasnosti u do 173 javne zgrade na području Tuzlanskog kantona.

III.

Vlada Kantona potvrđuje da je dokumentacija prihvatljiva za Kanton, a posebno:

- Nacrt Podugovora o grantu između Federacije Bosne i Hercegovine i EBRD-a,
- Usaglašeni Zapisnik s pregovora.

Vlada Kantona potvrđuje da ima potpisane:

- Ugovor o podršci zajmu zaključen između Tuzlanskog kantona i Evropske banke za obnovu i razvoj, te
- Projektni ugovor koji je zaključen između Ministarstva prostornog uređenja i zaštite okolice i Evropske banke za obnovu i razvoj.

IV.

Za realizaciju ove odluke i izvještavanje zadužuju se Ministarstvo finansija Kantona i Ministarstva prostornog uređenja i zaštite okolice Kantona, svako u okviru svoje nadležnosti.

V.

Daje se saglasnost za zaključivanje Podugovora o grantu između Federacije Bosne i Hercegovine, koju predstavlja Federalno ministarstvo finansija-Federalno ministarstvo financija i Tuzlanskog kantona koga predstavlja Ministarstvo finansija Tuzlanskog kantona.

Za potpisivanje Podugovora o grantu sa Federacijom Bosne i Hercegovine, ovlašćuje se ministar finansija kantona.

VI.

Ova odluka stupa na snagu narednog dana od dana objavljivanja u "Službenim novinama Tuzlanskog kantona".

**Bosna i Hercegovina
Federacija Bosne i Hercegovine
TUZLANSKI KANTON
Skupština Tuzlanskog kantona
T U Z L A**

Predsjednik Skupštine

Ivana Mijatović, v.r.

Broj:

Tuzla,

Obrazloženje

PRAVNI OSNOV ZA DONOŠENJE ODLUKE

Pravni osnov za donošenje predložene odluke sadržan je u članu 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", broj: 7/97 i 3/99 i "Službene novine Tuzlanskog kantona", broj: 13/99, 10/00, 14/02 i 6/04 i 10/04) kojim je utvrđeno da Skupština kantona donosi zakone i ostale propise neophodne za izvršavanje nadležnosti Kantona, članu 23. stav (1) tačka b) Zakona o dugu, zaduživanju i garancijama u Federaciji Bosne i Hercegovine („Službene novine FBiH“, br. 45/25) kojim je utvrđeno da se, kanton može zaduživati po osnovu vanjskog duga, između ostalog u svrhu finansiranja razvojnih programa i kapitalnih investicija odobrenih programom javnih investicija; članu 57. Zakona o izvršenju Budžeta Tuzlanskog kantona za 2026.godinu („Službene novine Tuzlanskog kantona“, br.18/25 i 3/26) kojim je utvrđeno da Kanton može stvoriti vanjski dug između ostalog u svrhu finansiranja razvojnih programa i kapitalnih investicija odobrenih programom javnih investicija i tački II-10. Procedura zaduživanja Tuzlanskog kantona na osnovu unutrašnjeg i vanjskog duga („Službene novine Tuzlanskog kantona“, br.17/25) kojom je utvrđeno da odluku o vanjskom zaduženju donosi Skupština Tuzlanskog kantona.

OBRAZLOŽENJE ODLUKE

Ministarstvo prostornog uređenja i zaštite okolice svojim aktom broj:12/1-19-8966-1/22 od 14.04.2022. godine dostavilo je Ministarstvu finansija Inicijativu za kreditno zaduženje za realizaciju Studije „Program energetske obnove zgrada javne namjene u nadležnosti Tuzlanskog kantona“ u kojoj se poziva na Informaciju o primjeni energijske efikasnosti na javnim objektima u nadležnosti Tuzlanskog kantona koju je Vlada prihvatila na sjednici od 12.3.2020. godine.

Kako se sadržaj ove odluke odnosi na isti projekat kao odluka o kreditnom zaduženju, obrazloženje dato za prijedlog navedene odluke odnosi se i na ovu odluku, odnosno na prihvatanje granta u iznosu 2.000.000,00 Eura u uspostavi funkcionalnog sistema zaštite okoliša i održivog upravljanja prirodnim resursima .

Prethodno su, u okviru navedenog projekta, potpisana ukupno četiri ugovora, i to: Ugovor o zajmu i Ugovor o grantu broj: 54032 od 24.06.2025. godine, zaključen između Evropske banke za obnovu i razvoj (Zajmodavac) i Bosne i Hercegovine (Zajmoprimac), kojim je Banka dala saglasnost da Zajmoprimac stavi na raspolaganje zajam, pod uslovima i rokovima koji su navedeni u Ugovoru, Ugovor o podršci zajmu zaključen između Tuzlanskog kantona i Evropske banke za obnovu i razvoj, te Projektni ugovor koji je zaključen između Ministarstva prostornog uređenja i zaštite okolice i Evropske banke za obnovu i razvoj.

Zaduženje koje je planirano predmetnim Ugovorima nije planirano u Budžetu TK-a za 2026. godinu, a niti Zakonom o izvršenju budžeta, zbog čega je potrebno da Skupština donese Odluku o prihvatanju Podugovora o zajmu i Podugovora o grantu.

U prilogu dostavljamo nacrt navedenog podugovora.

Takođe, navedeni projekat „Program energetske obnove zgrada javne namjene u nadležnosti Tuzlanskog kantona“ uvršten je u Program javnih investicija Tuzlanskog kantona 2026.-2028. godina.

PREDLAGAČ:
VLADA KANTONA

PODUGOVOR O GRANTU

za GRCF2 W2 E2 – Zgrade javne namjene Tuzlanskog kantona

između

FEDERACIJE BOSNE I HERCEGOVINE

koju predstavlja

**FEDERALNO MINISTARSTVO FINANSIJA
FEDERALNO MINISTARSTVO FINANCIJA**

i

TUZLANSKOG KANTONA

Sarajevo, _____ 2025. godine

PODUGOVOR O GRANTU

Zaključen na dan _____ 2025. godine između Federacije Bosne i Hercegovine koju zastupa Federalno ministarstvo finansija-Federalno ministarstvo financija (u daljem tekstu: Federacija) i Tuzlanskog kantona (u daljem tekstu:Kanton) kojeg zastupa _____, za grant Evropske banke za obnovu i razvoj koji se odnosi na Evropski zajednički fond za Zapadni Balkan za Projekat GRCF2 W2 E2 – Zgrade javne namjene Tuzlanskog kantona (u daljem tekstu: Projekat).

P R E A M B U L A

BUDUĆI DA je dana 24.06.2025.godine između Bosne i Hercegovine (u daljem tekstu: Primalac) i Evropske banke za obnovu i razvoj (u daljem tekstu: EBRD) zaključen Ugovor o grantu za finansiranje Projekta (u daljem tekstu: Ugovor);

BUDUĆI DA je dana 24.06.2025.godine između Evropske banke za obnovu i razvoj (u daljem tekstu: Banka) i Bosne i Hercegovine (u daljem tekstu: Zajmoprimac) zaključen Ugovor o zajmu (u daljem tekstu: Ugovor o zajmu) kojim je Banka dala saglasnost da Zajmoprimac stavi na raspolaganje zajam (u daljem tekstu: Zajam), pod uvjetima i rokovima koji su navedeni u Ugovoru;

BUDUĆI DA je _____ godine između Bosne i Hercegovine i Federacije BiH potpisan Supsidijarni ugovor (u daljem tekstu: Supsidijarni ugovor);

BUDUĆI DA je dana _____godine Skupština Kantona donijela Odluku prihvatanju zaduženja po Ugovoru o zajmu između Zajmoprimca i Banke za Projekat („Službene novine Kantona“ broj: ___/___),

BUDUĆI DA je Vlada Federacije Bosne i Hercegovine na svojoj 52. sjednici održanoj 09.04.2025. godine donijela Odluku o davanju saglasnosti o prihvatanju granta EBRD (Evropski zajednički fond za Zapadni Balkan) za Projekat („Službene novine Federacije BiH“ broj:28/25).

OVIM SU SE UGOVORNE STRANE DOGOVORILE, KAKO SLIJEDI:

ČLAN 1.

- 1.1. Federacija i Kanton su saglasni da će se svi pojmovi, uslovi i rokovi iz Ugovora o grantu i Supsidijarnog sporazuma *mutatis mutandis* primjenjivati i na ovaj Podugovor o grantu (u daljem tekstu: Podugovor).
- 1.2. Ovim Podugovorom utvrđuje se način i uslovi pod kojim će Federacija staviti na raspolaganje grant sredstva Kantonu, u ukupnom iznosu do 2.000.000,00 EUR.
- 1.3. Sredstva granta će biti iskorištena za za implementaciju mjera energetske efikasnosti u do 173 javne zgrade na području Tuzlanskog kantona.

ČLAN 2.

- 2.1. Kanton je saglasan sa ciljevima Projekta i obavezuje se da će ga izvršavati sa punom marljivošću i efikasnošću i u skladu sa odgovarajućom administrativnom, finansijskom, bankarskom, okolinskom i tehničkom praksom, i da će pružiti, ili potaći da se pruži, ako to bude potrebno, sredstva, objekte, usluge i druge izvore koji su potrebni za Projekat.
- 2.2. Kanton će koristiti svoja prava po ovom Podugovoru na takav način da zaštiti interese Banke, Primaoca i Federacije i postigne svrhu Projekta i neće pripisivati, dodavati ili se odreći ovog Podugovora ili bilo koje odredbe istog.
- 2.3. Kanton će uspostaviti sistem finansijskog upravljanja, uključujući podatke i račune i pripremati finansijske izvještaje koji će davati dovoljno informacija za odgovarajuće upravljanje, sve u skladu sa standardima računovodstva prihvatljivim za Banku, Primaoca i Federaciju, koji se konzistentno primjenjuju i adekvatno odražavaju sve njene operacije i finansijske uslove i bilježenje posebno operacija, izvora i troškova koji se odnose na Projekat.
- 2.4. Kanton je dužan na zahtjev Federacije, a najmanje tromjesečno, dostavljati Izvještaj o povlačenju i trošenju grant sredstava, kao i Izvještaj o realizaciji Projekta, izvršenju svojih obaveza po ovom Podugovoru i drugim pitanjima koja se odnose na ciljeve Projekta.
- 2.5. Kanton će imati zapisnike, račune i revidirane finansijske izvještaje za svaku fiskalnu godinu, u skladu sa odgovarajućim principima revizije koja se stalno primjenjuje od strane nezavisnih revizora prihvatljivim za Banku, Primaoca i Federaciju i predočiti Banci, Primaocu i Federaciji ne kasnije od šest (6) mjeseci nakon kraja svake takve godine, ovjerene kopije revidiranih finansijskih izvještaja za takvu godinu i izvještaj o takvoj reviziji od strane navedenih revizora, u takvom obimu i takvim detaljima koje Banka, Primaoci Federacija budu razumno tražili.
- 2.6. Kanton će na vrijeme obavještavati Banku, Primaoca i Federaciju o bilo kojem uslovu koji ometa ili prijeti da bi mogao ometati napredak Projekta.
- 2.7. Kanton će slijediti operativne i administrativne procedure za implementaciju Projekta, uključujući bez ograničenja, dostavljanje mjesečnih i kvartalnih finansijskih i drugih izvještaja Federaciji i prosljeđivati potrebne dokumente i fakture, te osigurati pristup Banci, Primaocu i Federaciji svim dokumentima koji se odnose na Projekat.
- 2.8. Za svaku isplatu/plaćanje iz sredstava granta koje će se vršiti po Ugovoru o grantu, Kanton će putem Federalnog ministarstva financija dostaviti Primaocu originalni zahtjev za isplatu/plaćanje u kome će navesti račun odgovarajućeg izvođača, iznos

ekvivalentan vrijednosti robe, radova i usluga koji se finansiraju od tog povlačenja sredstava, u formi zadovoljavajućoj za Banku, Primaoca i Federaciju.

- 2.9. Kanton će snositi troškove poreza u skladu sa važećim zakonskim propisima u Federaciji BiH i ostale troškove koji se mogu pojaviti u vezi sa zaključenjem i izvršenjem Ugovora o grantu, Supsidijarnog ugovora i ovog Podugovora.

ČLAN 3.

- 3.1. U slučaju da se ovaj Podugovor ne provede na način definiran u njemu, odnosno ukoliko su prekršene obaveze prema Ugovoru o grantu i ovom Podugovoru ili se grant sredstva budu koristila nenamjenski, Federacija može zahtijevati vraćanje ukupnog ili djelimičnog iznosa sredstava granta.
- 3.2. U svrhu osiguranja savjesnog korištenja grant sredstava, Kanton je dužan u roku 10 (deset) dana od potpisivanja ovog Podugovora dostaviti Federaciji 5 (pet) vlastitih bjanko mjenica sa klauzulom „bez protesta“ i Mjениčnom izjavom ovjerenom i potpisanom od strane ovlaštenog lica. Na osnovu ove odredbe, Kanton ovlašćuje Federaciju da primljene bjanko mjenice može koristiti za naplatu u slučaju suspendiranja Podugovora, neizvođenja ili neprovođenja na pravi način, odnosno ukoliko su prekršene obaveze prema Ugovoru o grantu i ovom Podugovoru, ili se grant sredstva budu koristila nenamjenski. U tom slučaju ovlašćuje se Federacija da može u primljenu bjanko mjenicu upisati iznos svih dospjelih potraživanja na dan popunjavanja mjenice, zatim datum dospijeca, domicilirati je po svojoj volji, upisati sve druge nedostajuće sastojke, te je podnijeti na isplatu, odnosno da mjenicom može provesti sve druge propisane radnje radi naplate mjeničnog potraživanja.

ČLAN 4.

- 4.1. Federacija će poduzeti ili prouzrokovati da se poduzmu sve neophodne ili odgovarajuće radnje da se dozvoli Kantonu da izvršava svoje obaveze po ovom Podugovoru i neće poduzimati ili dozvoliti da se poduzmu radnje koje bi spriječile ili se miješale sa takvim izvršenjem.
- 4.2. Robe, usluge i radovi potrebni za implementaciju Projekta će se nabavljati iz sredstava granta, prema odredbama Ugovora o grantu.

ČLAN 5.

- 5.1. Ako pravo Federacije na isplatu grant sredstava bude suspendovano ili ukinuto od strane Banke shodno odredbama Ugovora o grantu, pravo Kantona na isplate iz ovog Podugovora će isto tako i istovremeno biti suspendovane ili otkazane, u zavisnosti od slučaja.
- 5.2. Sve druge odredbe ovog Podugovora će se nastaviti u punoj snazi i učinku bez obzira na bilo koje otkazivanje ili suspenziju po Ugovoru o grantu.

ČLAN 6.

- 6.1. Federalni ministar finansija/financija ili bilo koja druga osoba ili osobe, u potpunosti pismeno ovlaštene od strane federalnog ministra finansija/financija mogu, u ime Federacije, preduzimati bilo koje radnje ili sačiniti bilo koja dokumenta koja se zahtijevaju ili su dozvoljena ovim Podugovorom.
- 6.2. _____ ili bilo koja druga osoba ili osobe koje su u potpunosti pismeno ovlaštene od strane _____, a u ime Kantona, mogu preduzimati bilo koje radnje koje se od njega ili njih zahtijevaju, a dozvoljena su ovim Podugovorom.

ČLAN 7.

- 7.1. Ukoliko se ne ispune ili djelomično ispune uslovi predviđeni ovim Podugovorom ili bilo koje obaveza koje iz njega proizilaze, sporazumne strane mogu raskinuti ovaj Podugovor.
- 7.2. Ugovorne strane mogu raskinuti ovaj Podugovor, posebnim Ugovorom o raskidu između Federacije i Kantona, koji mora biti u pismenoj formi i u kojem će biti regulisane sve posljedice takvog raskida.
- 7.3. Ukoliko nastupi neki od razloga za raskid, Federacija će pismenim putem pozvati Kanton da u roku od 30 dana od dana prijema obavijesti i otkloni nastali razlog za raskid Podugovora.
- 7.4. Ukoliko Kanton u predviđenom roku iz ovog člana ne udovolji zahtjevu Federacije i ne otkloni razlog za raskid, Federacija ima pravo jednostrano raskinuti ovaj Podugovor izjavom o raskidu, koja će biti dostavljena Kantonu preporučenom poštom (s povratnicom). Ovaj Podugovor će se smatrati raskinutim nakon protoka otkaznog roka od 30 dana koji počinje teći od dana dostave izjave o raskidu.
- 7.5. U slučaju da ovaj Podugovor bude raskinut zbog povrede obaveza Podugovora od strane Kantona, odnosno iz razloga neispunjavanja ili djelomičnog izvršenja, Kanton, će biti odgovoran za svu štetu koja može nastati Federaciji bilo direktno ili indirektno, zbog takvog raskida.
- 7.6. Raskidom Podugovora, ugovorne strane se oslobađaju obaveza, izuzev finansijskih obaveza Kantona koje su proistekle potpisivanjem ovog Podugovora, uz obaveze naknade štete Federaciji.
- 7.7. U slučaju daljnjeg prijenosa ili ustupanja, preuzimatelj prava i/ili obaveza će pristupiti ovom Podugovoru i postati korisnik granta kao da je bio imenovana ugovorna strana na dan potpisivanja ovog Podugovora, i ima ista prava, obaveze i ugovornu poziciju kao ranija ugovorna strana, odnosno Kanton.

ČLAN 8.

- 8.1. Na sve što nije regulisano ovim Podugovorom, primjenjivat će se odredbe Zakona o obligacionim odnosima kao i odredbe drugih važećih zakona u Federaciji BiH.

- 8.2. Svi sporovi koji budu nastali po osnovu ovog Podugovora ili u vezi sa istim, a koji se ne mogu sporazumno riješiti između Federacije i Kantona, konačno će se riješiti pred nadležnim sudom u Sarajevu.
- 8.3. Ako bilo koja odredba ovog Podugovora bude nevažeća, to neće uticati na valjanost ostalih odredaba. Bilo koji nedostatak koji iz toga proizađe bit će popunjen odredbom u skladu sa svrhom ovog Podugovora.
- 8.4. Bilo koja obavijest ili zahtjev koji se traži ili dozvoljava po ovom Podugovoru i svi ugovori između strana, biti će u pismenoj formi.
- 8.5. Sve izmjene i dopune ovog Podugovora imaju pravno dejstvo ukoliko su sačinjene u pisanoj formi kao Aneks ovog Podugovora i stupit će na snagu kada ih prihvate i potpišu ovlašteni predstavnici Federacije i Kantona.

ČLAN 9.

- 9.1. Svaka obavijest, traženje ili zahtjev potreban ili dozvoljen da se da ili podnese po ovom Podugovoru će biti u pisanom obliku i smatrat će se da je dat ili podnesen kada bude dostavljen na ruke, poštom ili telefaksom na adresu niže naznačene osobe ili na bilo koju drugu adresu koju će ta osoba naznačiti u pisanom obliku strani koja daje obavijest ili podnosi zahtjev:

Za Federaciju:

Federalno ministarstvo finansija
Federalno ministarstvo financija
Mehmeda Spahe 5
71000 Sarajevo

Na pažnju: Ministar

Telefax: +387 33 253 500

Za Kanton:

Na pažnju:

Telefon: _____ fax: _____

- 9.2. Ako se bilo koja od gornjih adresa i/ili imena promijene, strane su o tome dužne odmah obavijestiti drugu ugovornu stranu pismeno o novim adresama/i ili imenima.

ČLAN 10.

- 10.1. Ovaj Podugovor stupa na snagu danom potpisivanja Supsidijarnog sporazuma između Primaoca i Federacije.
- 10.2. Ovaj Podugovor je sačinjen u 4 (četiri) istovjetna primjerka, od kojih svaka strana zadržava po 2 (dva).

FEDERACIJA BOSNE I HERCEGOVINE

TUZLANSKI KANTON

**Federalno ministarstvo finansija
Federalno ministarstvo financija**

Ministar

Toni Kraljević

Broj: _____

Broj: _____

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-19 - 8966 / 22
Tuzla, 08.12.2022. godine

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), a u skladu sa Zaključkom Skupštine Tuzlanskog kantona broj: 01-02-643-2/22 od 05.12.2022. godine, Vlada Tuzlanskog kantona na sjednici održanoj dana 08.12.2022. godine, d o n o s i

ODLUKU

I

Prihvata se tekst Mandatnog pisma Evropske banke za obnovu i razvoj, a u vezi sa realizacijom projekta “Program energetske obnove zgrada javne namjene u nadležnosti Tuzlanskog kantona”.

II

Ovlašćuje se Premijer Kantona i ministar finansija da potpišu Mandatno pismo iz tačke I ove Odluke.

III

Odluka stupa na snagu danom donošenja.

DOSTAVITI:

- 1 x Ministarstvu prostornog uređenja
i zaštite okolice
- 1 x Ministarstvu obrazovanja i nauke
- 1 x Ministarstvu finansija
- 1 x Evidenciji
- 1 x a/a



PREMIJER KANTONA

Irfañ Halilagić

Na osnovu člana 111. stav (2) Poslovnika Skupštine Tuzlanskog kantona („Službene novine Tuzlanskog kantona”, br. 13/19 i 5/20), razmatrajući Zaključak Vlade Tuzlanskog kantona broj: 02/1-19-8966/22 od 24.11.2022. godine sa Mandatnim pismom Evropske banke za obnovu i razvoj, Skupština Tuzlanskog kantona, na sjednici održanoj 5.12.2022. godine, donosi

ZAKLJUČAK

I

Skupština Tuzlanskog kantona podržava aktivnosti Vlade Tuzlanskog kantona u vezi sa realizacijom projekta „Program energetske obnove zgrada javne namjene u nadležnosti Tuzlanskog kantona” putem obezbjeđenja dugoročnog finansiranja, u obliku državnog zajma u iznosu do 8 miliona eura, pod uslovima sadržanim u Mandatnom pismu.

II

Skupština Tuzlanskog kantona ovlašćuje premijera i ministra finansija Tuzlanskog kantona da potpišu Mandatno pismo Evropske banke za obnovu i razvoj.

Bosna i Hercegovina
- Federacija Bosne i Hercegovine
TUZLANSKI KANTON
Skupština
Broj: 01-02-643-2/22
Tuzla, 5.12.2022. godine



Predsjednik
Skupštine Tuzlanskog kantona

Žarko Vujić

12/7.

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), člana 38. stav (1) tačka 5., a u vezi sa članom 41. Zakona o dugu, zaduživanju i garancijama u Federaciji Bosne i Hercegovine („Službene novine FBiH“, br. 86/07, 24/09, 44/10 i 30/16) i člana 53. stav (2) i člana 54. stav (1) tačka 2. Zakona o izvršenju Budžeta Tuzlanskog kantona za 2022. godinu („Službene novine Tuzlanskog kantona“, br. 23/21 i 8/22), Vlada Tuzlanskog kantona, na sjednici održanoj dana 06.06.2022. godine, d o n o s i

O D L U K U

o davanju prethodne saglasnosti za kreditno zaduženje za realizaciju studije „Program energetske obnove zgrada javne namjene u nadležnosti Tuzlanskog kantona“

I

Vlada Tuzlanskog kantona izražava spremnost i daje prethodnu saglasnost za zaduženje Tuzlanskog kantona (u daljem tekstu: Kanton) kod Federacije Bosne i Hercegovine (u daljem tekstu: Federacija BiH) kao supsidijarnog zajmoprimca po Sporazumu o kreditu između Bosne i Hercegovine i Evropske banke za obnovu i razvoj (u daljem tekstu: EBRD), u iznosu od 8.000.000,00 (slovima: osammiliona Eur-a), radi realizacije Studije „Program energetske obnove zgrada javne namjene u nadležnosti Tuzlanskog kantona“ (u daljem tekstu: Projekat).

II

Konačne odluke o zaduženju donijeti će Skupština Tuzlanskog kantona, a po okončanju pregovora na državnom nivou kojim će se utvrditi uslovi kreditnog zaduženja, u skladu sa kreditnim sporazumom između Bosne i Hercegovine i EBRD-a i Zakonom o dugu, zaduživanju i garancijama u Federaciji BiH.

III

Ukupna vrijednost Projekta iznosi 15.813.900 (slovima: petnaestmilionaosamstotinatrinaest hiljadaidevetsto Eur-a).

Kreditna finansijska sredstva u iznosu od 8.000.000,00 Eur-a čine 50,59% ukupne vrijednosti Projekta.

Pored kreditnih sredstava iz prethodnog stave, EBRD obezbijedit će grant sredstva u iznosu 2.000.000,00 (slovima:dvamiliona Eur-a) za realizaciju Projekta, te donaciju u iznosu 500.000,00 (slovima: petstotinahiljada Eur-a) namijenjenih za tehničku pomoć.

UNDP u BIH učestvovat će u realizaciji Projekta sa sredstvima u iznosu 1.500.000,00 (slovima: jedanmilionipetstotinahiljada Eur-a) namijenjenih za finansiranje detaljnih energetskih audita i glavnih projekata objekata.

IV

Uslovi odobrenja kredita EBRD-a su:

Iznos zajma: 8.000.000 Eur-a

Trajanje zajma: 15 godina, uključujući grejs period od 3 godine

Otplata: 24 jednake polugodišnje rate tokom 12 godina nakon grejs perioda od 3 godine

Kamatna stopa: 1% godišnje plus šestomjesečni EURIBOR obračunato na povučena sredstva zajma

Ostali finansijski uvjeti:

Jednokratna provizija- 1% iznosa zajma

Provizija na odobrena, a neutrošena sredstva zajma - 0,5% godišnje.

V

Za realizaciju ove odluke zadužuje se Ministarstvo finansija i Ministarstvo prostornog uređenja i zaštite okolice, svako iz svoje nadležnosti u proceduri realizacije Projekta.

VI

Ova Odluka stupa na snagu danom donošenja i objaviće se u „Službenim novinama Tuzlanskog kantona“

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-11-13204/22
Tuzla, 06.06.2022. godine



PREMIJER KANTONA

Irfan Halilagić
Irfan Halilagić

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1- 19- 36 133 / 24
Tuzla, 24.12.2024. godine

Na osnovu člana 5. i 29. Zakona o Vladi Tuzlanskog kantona ("Službene novine Tuzlanskog kantona", br. 17/00, 1/05, 11/06, 13/11 i 15/17), Vlada Tuzlanskog kantona na sjednici održanoj dana 24.12.2024. godine, donosi:

ZAKLJUČAK

I

Usvaja se Informacija Ministarstva prostornog uređenja i zaštite okolice o aktivnostima na realizaciji projekta „Program energetske obnove zgrada javne namjene u nadležnosti Tuzlanskog kantona“.

II

Prihvata se prijedlog Ministarstva prostornog uređenja i zaštite okolice o nastavku daljih aktivnosti na realizaciji projekta „Program energetske obnove zgrada javne namjene u nadležnosti Tuzlanskog kantona“, kao i usaglašeni nacrti Ugovora o zajmu, Ugovora o grantu, Projektnog ugovora i Ugovora o podršci zajmu.

III

Ovlašćuju se ministar finansija i ministar prostornog uređenja i zaštite okolice da, u ime Vlade Tuzlanskog kantona potpišu Ugovor o zajmu, Ugovor o grantu, Projektni ugovor i Ugovor o podršci zajmu.

IV

Ministarstvo pravosuđa i uprave će davati pravna mišljenja u ime Tuzlanskog kantona.

DOSTAVITI:

- 1 x Ministarstvu prostornog uređenja i zaštite okolice
- 1 x Ministarstvu finansija
- 1 x Ministarstvu pravosuđa i uprave
- 1 x Evidenciji
- 1 x a/a



PREMIJER KANTONA

Irfan Halilagić